

Illuni kikkunnit tamanit iserfigineqarsinnaasuni imaluunniit amerlasuunik sulisoqarfiutigisuni pisortat sanaartortitsinerini iluarsaassinikkullu suliaqarnerini (pisortat sanaartortitaat) sanaartornissamut aningaasaliissutit tamakkerlutik 1 %-iinik sanaartukkap silataatigut iluatigullu kusassarneqarnissaannut atugassanik Naalakkersuisut immikkoortitsisaqqullugit peqquneqarnissaannik Inatsisartut aalajangiinissaannik siunnersuut. Aningaasat taakku ingerlatassamut immikkut normulerneqartassapput ukiumoortumillu Aningaasanut inatsisissatut siunnersuummi takuneqarsinnaassallutik.

(Inatsisartuni ilaasortaq Jane Petersen, Inuit Ataqatigiit)

Akissuteqaat

(Ineqarnermut, Attaveqarnermut Angallanermullu Naalakkersuisoq)

Siullermeerneqarnera

Matumani pisortat illuutaanni, tamanit iserfigineqarsinnaasuni, imaluunniit illuni amerlasuunik sulisoqarfiusuni sanaartugassat iluarsagassallu pineqartillugit, aammalu siunnersuut inissialiortiternernut, tassungalu ilanngullugu ilinniartunut inaannik sanaartornernut atuutsinnagu, Inatsisartuni ilaasortap Jane Petersenip siunnersuutaanut Naalakkersuisut tapersiisinnaapput.

Kisiannili sanaartornermut akiusup 1%-iata illumik kusasaanermut atorneqartussap naammannissaa pingaaruteqarpoq. Sanaartugaq 45 mio. koruuneqarpat, taassuma 1%-ia 450.000 koruuniuvoq. Taamaattumik piunasaqaat taamaallaat sanaartukkanut, katillugit 40 mio. koruuninik amerlanerusunilluunniit nalilinnut, aammalu 40 mio. koruunit sinnerlugit, kisiannili 100 mio. koruunit inorlugit nalilinnut atuutsinneqassanersoq isumaliutigineqarsinnaavoq. 100 mio. koruuninik imaluunniit sinnerlugit nalilinnik sanaartornermi akiusup 1%-ia immikkoortinneqartassaaq.

Aningaasat illuartinneqartut sanaartukkap aalajangersimasup kusassarneqarnissaanut atugassatut immikkoortinneqartassapput, aammalu suleriaaseq »no cure, no pay« malillugu eqqumiitsuliortut Kalaallit Nunaanni nunaqavissut akornanni unammisitsinikkut neqerooruteqartitsisoqartassalluni. Kusassakkap kulturikkut ingerlatitseqqittuunissaa piunasaqaatigineqartassaaq, aammalu oqaluttuarisaanitsinnik oqaluttuaatitsinnillu sorlaqarfeqarsinnaallutik. Aamma Kalaallit Nunaat naggorissoq, sassarsimaartoq namminersortorlu pillugu takorluukkanik, immikkut kultureqarnitta paasisimaarinissaa eqqarsaatigalugu tunngaveqarsinnaavoq.

Taamatut oqareerluni Nunap Karsiata akiliisinnaassusiata annikinnera, isertitat ikiliartornerat aammalu aningaasartuutit amerliartornerat, taamaattumillu aningaasat tamarmik sukannersumik pingaarnersiorneqartariaqarnerat isiginngitsuusaarneqarsinnaanngilaq. Taakkunungalu sanaartugassanut aningaasat ilaapput. Aningaasat eqqumiitsuliortnermut atorneqartussaagaluit assersuutigalugu ilinniartunut inissianik amerlanerusunik

sanaartornermut atorneqarunik inuiaqatigiit aningaasaqarnerat eqqarsaatigalugu naleqqunnerpaassagalarpoq.

Aamma pisuni ataasiakkaani aningaasat ataatsimut kusassaanermut salliutinneqarunik iluaqutaanerpaassanersut, imaluunniit suliassap pitsaassusaanut eqquissanersut eqqarsaatigilluassallugu pingaaruteqarpoq.

Sanaartugassat tamarmik suliassamut marlunnik, tassalu sanaartugassartaat ataatsimik aammalu kusassagassartaat ataatsimik normoqartinneqassappata ajornartorsiorfiulertussaavoq, Sanaartugassanut Iluarsagassanullu Aningaasaateqarfimmi sanaartugassatut suliassat amerlassutsimikkut ikilisaaffigineqarnissaat Naalakkersuisunit Inatsisartunillu ersarissumik kissaatigineqarmat. Tamatumunnga taarsiullugu kusassagassanut aningaasaliussassat unitsitsinikkut iluarsiivigineqarsinnaapput, taamatuttaarlu aningaasaliissutinit 10%-it qularnaveequsiissutitut unitsinneqartarsinnaallutik.

Taamatut oqaaseqarluta siunnersuutip oqaaseqaatit matumani saqqummiunneqartut ilanngullugit tapersersorneqarnissaa, aammalu siunnersuutip Inatsisartut Aningaasanut Inatsisaanni oqaasertaliussanut ilanngunneqarnissaa Naalakkersuisuniit tapersersinnaavarput.